

## IL PAUPER ED IL RITG

Avant blers onns abitava il Segner sin terra cun ils umans. Ina saira era el fitg stanchel. I fascheva gia notg cura ch'el è arrivà en in vitg. Sper via eran duas chasas, l'ina en fatscha a l'otra. Ina era gronda e bella, l'otra pitschna e trida. La gronda appartegneva ad in um ritg, la pitschna ad in pauper. Il Segner ha ditg per sasez: "Al ritg na dun jau betg grond disturbi, là vi jau dumandar albiert." Sin il spluntar dal Segner ha il ritg avert la fanestra ed ha dumandà tge ch'el veglia. "Jau rog per in lieu da star sur notg", ha ditg il Segner. Il ritg al ha guardà da chau fin pe. Il Segner purtava vestgadira simpla e pareva d'avair paucs daners en giaglioffa. Il ritg ha squassà il chau ed ha ditg: "Mias chombras èn plainas cun ervas da tés e sems. Sche jau vuless dar dimora a mintga schani che splunta vi da mes isch, pudess jau bainprest ir mez a batlegiar per in lieu da star sur notg. Guardai da vegnir sut tetg insanua auter." Cun quels plets ha el serrà la fanestra ed ha laschà star il Segner avant isch.

Il Segner è sa vieut ed ha spluntà vi da la porta dal pauper. Quel ha immediat avert ed envidà il viandant da vegnir tar el. "Igl è gia stgira notg ed oz na vegnis Vos betg pli lunsch", ha ditg il pauper. Quels plets han plaschì al Segner ed el è ì en chasa. La dunna dal pauper ha dà il maun al Segner ed al ha beneventà cordialmain. "Il pauc che nus avain dain nus da cor", ha ella ditg. Ella ha mess si tartuffels e mulsch la chaura

per avoir in cuppin latg tiers. Il Segner è sa mess a maisa cun la paupra glied.

La simpla tschaina al gustava bain, perquai che las fatschas cuntentas dals paupers al faschevan plaschair.

Suenter tschaina ha la dunna ditg dascusamain a ses um: "Nus stain questa saira sin il banc-pigna e laschain durmir il viandant en noss letg; el è segir fitg stanchel." "Gugent", ha l'um respundì ed ha supplitgà il Segner da durmir en lur letg. Il Segner che n'ha betg vulì dar grond disturbi, na vuleva l'emprim betg, ma l'um e la dunna han insistì fin ch'el Segner ha acceptà.

La proxima damaun èn els stads si avant ch'i fascheva di a preparar l'ensolver per il giast. Era il Segner è vegnì alert gia fitg baud. Suenter avoir ensulvì cun la glied, è el sa mess sin via. Ma sin l'isch-chasa è el sa vieut ed ha ditg: "Perquai che vus essas stads uschè buns cun mai, pudais vus giavischar trais chaussas. Jau as dun quai che vus giavischais." Il pauper um ha ditg: "Jau na giavisch per nus nagut auter che d'arrivar en tschiel, buna sanadad ed il paun da mintgadi, uschè ditg che nus vivain. Auter na sai jau betg tge giavischar." "N'avessas betg gugent ina chasa nova empè da questa veglia?", ha il Segner dumandà. "Gugent, sche nus pudain avoir la chasa sper ils auters giavischs", ha il pauper ditg. Immediat ha il Segner midà la chasa dals paupers en ina

bella chasa nova. Alura ha el prendì cumià.

Pli tard, igl era gia bel cler di, è l'um ritg levà ed ha guardà or da fanestra. Al lieu da la baracca dal vischin ha el vis ina stupenta chasa. El ha clamà la dunna ed ha ditg: “Ma tge è quai? Guarda ina giada! Empè da la baracca trida dals paupers stat là ina bella chasa nova. Va svelt vi e dumonda als vischins co che quai saja pussaivel!” La dunna è ida immediat ed ha dumandà ora els. L'um ha raquintà ad ella: “Ier saira è arrivà tar nus in viandant ed ha dumandà albiert. Nus al avain dà in letg ed oz ans ha el accumulì trais giavischs – che nus arrivian en tschiel, che nus restian sauns e che nus hajan mintga di da mangiar avunda. E vitiers ans ha el anc regalà questa stupenta chasa.”

La dunna dal ritg è currida tar ses um ed ha raquintà tut. Il ritg ha ditg: “Jau ma pudess strair ora tut ils chavels. L'ester è stà qua ier saira, l'emprim tar mai, ed jau al hai stgatschà.”

“Ta metta immediat en sella”, ha la dunna clamà, “ti pos anc suandar el. Guarda ch'era ti possias exprimer trais giavischs.”

Il ritg è partì e bainbaud ha el vis il Segner. Cun plaschentinhas ha el rugà il Segner: “Betg sajas permalà che jau n'hai betg beneventà Vus en mia chasa. Jau hai tschertgà la clav ed entant eras Vus gia svani. Sche Vus passais in'otra giada mia chasa, alura dai in clom!”

“Gea, quai vi jau bain far”, ha respundì il Segner. Sinaquai ha il ritg dumandà, sch'el possia era giavischar trais chaussas sco ses vischin. “Vus pudais far quai, ma igl è probablmain meglier, sche Vus na giavischais nagut”, ha il Segner ditg. “Jau vi bain giavischar il gist, basta che mes giavischs gajan era en vigur”, ha il ritg replitgà. Ed il Segner ha respundì: “Turna a chasa! Tes giavischs vegnan ademplids!”

Legher e cuntent è l'um ritg turnà a chasa. El ha ponderà ditg e bain tge ch'el vuless giavischar. Siond talmain en patratgs ha el laschà crudar ils mastrins or da maun. Il chaval ha cumenzà a siglir. L'um al ha stritgà il culiez ed ha ditg: “Plaun, Lisa, plaun!” Ma il chaval è galoppà pli fitg. Il ritg è vegnì grit ed ha sbragì: “Jau vuless che ti rumpessas il culiez!” Strusch ditg quai, è l'animal crudà per terra, ha rut il culiez e n'è betg sa muventà pli. L'emprim giavisch era ì en vigur.

Il ritg era ussa senza chaval ed ha stuì ir a pe a chasa. Almain la sella vuleva el prender a chasa. “Anc dus giavischs hai jau”, ha el pensà. El suava ed aveva nauscha luna. Cun pensar als ulteriurs giavischs al è vegnì endament quant bel che la dunna haja a chasa, en stiva frestga cun in bun gentar. Senza ponderar ha el ditg plain scuidanza: “Jau vuless che mia dunna sesess sin questa sella e na pudess betg pli vegnir giu da quella.” Cun l'ultim pled or da bucca è la sella svanida. Il segund giavisch era damai era ì en vigur.

Ussa faschevi anc pli chaud. Il ritg aveva cumenzà a curre. A chasa vuleva el studegiar insatge bel e bun per ses ultim giavisch. Arrivà a chasa ha el vis sia dunna amez stiva sin la sella. Ella cridava e planscheva. L'um ha ditg: "Betg planscha. Jau vi giavischar tut las ritgezzas dal mund. Hajas pazienza e sta sin la sella!" "Tge ma gidan tut las ritgezzas, sche jau stoss star mia entira vita sin ina sella? Ti m'has giavischà sin questa sella, fa che jau vegnia deliberada immediat!" Il ritg n'ha betg pudì far auter che giavischar che la dunna vegnia deliberada da la sella. Uschia è l'ultim giavisch ì en vigur. Deliberada da la sella ha la dunna ditg: "Ti es in pauper tamberl. Ti has fatg tut sutsura. Jau fiss stada bler pli furbra." Sper la perdita da ses bel chaval ha il ritg mo pli gì displaschair e disfortuna en sia vita. Ils paupers dentant han vivì cuntents e ventiraivels fin al di da lur mort.